



FACTVM,

Pour Messire François de Laubespín, Abbé des Abbayes de Vaast & de Menat, Defendeur.

Contre Jacques Coüette Sieur de la Roche de Vaast, Demandeur en Lettres de rescision du 20. Iuin, signifiées le 29. Nouembre 1654. contre la Transaction du dernier May audit an.

Et encores, ledit de Laubespín, Demandeur en contresommation de la poursuite d'Helie Desecots, poursuiuy par ledit Coüette.

Contre iceluy Coüette, Defendeur en ladite contresommation, & aux Lettres en forme de Requeste Civile dudit Desecots, contre certain Executoire & Arrests de la Chambre des Vacations, des 14. & 20. Octobre 1654.



Il y a deux Instances jointes par Arrest, & toutes deux renuoyées en la cinquiesme des Enquestes, mesmes par Arrest du Conseil Priué, à cause que ledit Sieur Abbé, est Beau-frere de Monsieur Perrot de la Malmaison, Conseiller en la Grand' Chambre.

PREMIERE INSTANCE.

Il s'agit de l'entherinement des Lettres de rescision temerairement obtenuës par Coüette, contre vne Transaction sur Procez, qui est la plus haute tricherie dont on ait jamais ouïy parler. Voicy la matiere de cette Transaction.

Ledit Sieur Abbé, a vne Sœur nommée Iacqueline de Laubespín, Religieuse à Bonlieu, assez près de la Terre de Bossé, où il fait sa residence ordinaire. Cette Fille ayant esté quelque temps par Congé de son Abbesse, & pour paruenir à vne bonne fin, dans ladite Maison de Bossé, Coüette qui y estoit souffert auparauant que de s'estre jetté dans le débordement où il a depuis paru, & qui a donné sujet à sa propre Fille d'en faire plainte à la Cour, pour s'oster de ses mains dangereuses, s'oublia jusques au point de se faire l'autheur de l'enleuement de cette Religieuse, à laquelle il vouloit mesmes faire abjurer la Religion Catholique pour l'espouser; & parce qu'il a esté poursuiuy de près, il luy a fait espouser vn autre miserable, au grand scandale de la Religion & de l'honneur de la Famille de cette insensée, laquelle n'a pû estre retrouvée que depuis peu & au mois de Fevrier 1659. qu'ell'a esté conduite vers son Abbesse pour receuoir la Penitence qu'elle luy ordonnera.

Aprés cet enleuement ledit Sieur Abbé fit sa plainte au Iuge des lieux qui est le Lieutenant Criminel de Chasteauduloir, où par contumace ledit Coüette fut condamné d'auoir la teste tranchée, dont Appel à la Cour; pendant lequel, Coüette ayant esté arresté prisonnier, interuint Arrest contradictoire, par lequel il fut restitué contre la contumace en refundant les despens, & le Procez renuoyé pardeuant le Lieutenant Criminel du Mans, où ledit Coüette ayant esté transferé, & le Procez instruit de toutes ses formes, Sentence interuint le 28. Mars 1654. par laquelle, il a esté atteint & conuaincu dudit enleuement, & pour reparation condamné de comparoir à la grille de l'Abbaye de Bonlieu; & là, nuë teste & à genoux, en presence de l'Abbesse, des Religieuses, & dudit Sieur Abbé, & de tels de ses parens que bon luy sembleroit, Reconnoistre qu'il est l'autheur de l'enleuement & fuite de ladite de

A



Laubespain hors la maison dudit Sieur Abbé, dont il demanderoit pardon, & les suppleroit d'oublier l'injure; Condamné en outre de servir le Roy à ses despens pendant trois ans; en douze cens liures de reparation, dommages & interets; & en cinquante liures d'amende: pour lesquelles sommes il tiendrait Prison, & aux despens du Procez: De laquelle Sentence ledit Coüette interjeta encores appel en la Cour.

En cet estat, il employa tous ses Parens & Amis pour accommoder l'affaire. La Dame Abbessé de Bonlieu qui avoit laissé faire tous les fraiz audit Sieur Abbé de Laubespain & n'estoit point partie, donna les mains à la remise de la peine pour éviter le scandale plus grand, qu'elle estimoit rejallir sur son Monastere par le bruit de cette amende honorable; & ledit Sieur Abbé se laissa aussi fléchir par les mesmes considerations & pour s'acquiescer le repos. De sorte, que le dernier May 1654. par l'advis de leurs Aduocats & de leurs Amis se fit l'accordement entr'eux, par lequel ledit Sieur Abbé moyennant vne legere satisfaction & le payement des despens qu'il avoit faits, remit les reparations civiles & pecuniaires; & les despens furent sur le champ liquidez à l'amiable par leurs Aduocats à 2155. liures, dont le payement fut fait de partie par ledit Coüette, & pour l'autre elle fut deleguée. Par cette mesme Transaction, ledit Coüette s'obligea de tirer & mettre hors ledit Sieur Abbé d'un cautionnement qu'il avoit fait pour luy, à cause du Bail judiciaire de sa Terre de la Roche de Vaast, qui est le sujet de la seconde Instance.

Après cela, ledit Coüette ayant esté mis hors des Prisons, il vint en cette Ville de Paris, où il choisit un Rapporteur, & sans partie, ny instruction quelconque, il fit rendre un Arrest d'absolution à la Tournelle le 5. Septembre audit an 1654. Voicy sa ruse, qui est miserable, condamnable, & digne de la colere des Iuges.

Quatre iours après que ledit Coüette fut sorty de prison, il pretend avoir fait vne protestation secrette au Mans, pardevant un autre Notaire & tesmoins, que ceux de la Transaction. Et que pendant la poursuite de son Arrest d'absolution, il a obtenu le 20. Juin 1654. des Lettres de restitution en Chancellerie, dont il a fait vne Production nouvelle audit Procez. Mais à qui a-t'elle esté signifiée? C'est chose constante que ladite Production nouvelle n'a esté signifiée à personne, & qu'il n'y a point eu de conclusions de la contredire, quoy qu'elle ne puisse estre Production nouvelle, autrement, mesmes contre Monsieur le Procureur General, es causes où il est seule Partie. Il est aussi constant, que ny la Protestation, ny les Lettres dudit Coüette n'ont point esté signifiées audit Sieur Abbé que le 29. Novembre 1654. plus de deux mois & demy après l'Arrest d'absolution par luy surpris le 5. Septembre, sur ce qu'il a voulu faire voir du Procez, n'ayant personne pour le controller, ny qui voulust empescher qu'il ne l'obtint, au moyen de l'accordement du 30. May, par lequel cela estoit expressement stipulé par ledit Coüette. Et c'est vne friponnerie toute pure, & vne affectation recherchée, d'avoir fait inserer par un Clerc de Greffe, dans le veu dudit Arrest, contre l'ordre & la verité des choses, le veu desdites Lettres de restitution du 20. Juin, non réglées, ny mesmes signifiées aussi bien que ladite pretendue Protestation, & ladite Requête qualifiée Production nouvelle, non responduë que d'un *soit montré*, & non signifiée, ny contredite par personne.

Ainsi, lors que ledit Sieur Abbé de Laubespain a defendu aux Lettres dudit Coüette à luy signifiées le 29. Novembre 1654. il l'a soustenu non recevable, non seulement parce que c'est vne Transaction sur Procez, contre laquelle les Lettres ne sont point recevables par l'Ordonnance: Mais encores, parce que dans cette espee, c'est vne tricherie évidente, & vne mauvaïse foy insigne d'un homme artificieux & malicieux, qui ne peut satisfaire le ressentiment qu'il a contre ledit Sieur Abbé de Laubespain, à cause du coup manqué en la personne de ladite Sœur Jacqueline de Laubespain. Ce qu'il a manifesté par les iniures atroces escrites contre l'honneur dudit Sieur Abbé, qui en a demandé reparation par Requête formelle. Et l'insolence dudit Coüette passe si avant, que dans ses Requestes, il ne parle jamais dudit Sieur de Laubespain que comme d'un valet, il ne le nomme que *François de Laubespain* simple-

ment, & par orgueil, quoy que ledit Sieur de Laubespain ait l'honneur d'estre Abbé de deux belles Abbayes, & qu'il soit le Bien-facteur dudit Coüette, qui n'auroit pas du pain sans vne pension qu'il luy a donnée sa vie durant, par vn Contract produit au Procez.

L'objection & le Moyen allegué par ledit Coüette, qu'il estoit prisonnier lors qu'il a fait la Transaction dont il s'agit, est vne pure illusion : Car l'experience journaliere nous enseigne, que les Transactions faites avec des prisonniers, ne sont pas moins bonnes que les autres. La raison est, que ce n'est pas vne partie qui tient l'autre prisonniere, c'est la Justice, qui a des oreilles pour les vns & pour les autres. Autrement, les prisonniers seroient d'une malheureuse condition, & il leur arriueroit de grands inconueniens, s'ils ne pouuoient faire de bonnes Transactions, estans en cet estat, quoy qu'assistez de conseil, & que par toutes les regles de la prudence, ils les deussent faire. Ce que l'on dit communément de la restitution contre vne obligation faite *in vinculis*, est emprunté de la Loy *Succurritur 9. ff. Ex quibus causis maiores in integrum restit.* où il est dit, *qui a latronibus, aut praeconibus, vel potentiore vi oppressus, vinculis coërechaturs* : & là, *potentior vis*, est autant comme *vis maior*, qui s'applique à ceux qui par leur propre autorité exercent vne violence sur autrui : mais ne fut iamais dit de celuy qui a procez contre vn autre, qui est emprisonné par autorité du Magistrat, & qui veut terminer par vne Transaction, pour se procurer la paix & le repos, choses inestimables.

Et au reste, tout l'auantage est du costé de Coüette en ladite Transaction, par laquelle ledit Sieur Abbé a remis audit Coüette, à la priere de ses parens & amis, la plus grande partie des aduantages de la Sentence rendue à son profit par les Presidiaux du Mans, le 28. Mars 1654. Il dit neantmoins qu'il a quitté de grandes pretentions pour raison des cheuaux sur luy saisis & vendus pendant la contumace, & que le Lieutenant Criminel du Chasteauduloir l'a spolié de plusieurs autres choses, desquelles il n'a point parlé. Toutes fables ; Ledit Coüette est vn miserable, qui n'auoit pas de quoy viure chez luy, & dont la Terre n'estoit affermée par Bail Iudiciaire qu'à deux cens dix liu. A la verité, pour raison de ses cheuaux, qui, quoy que de peu de valeur, luy deuoient estre rendus apres la contumace purgée, il luy fut permis de se pouruoir, par ladite Sentence du Mans ; & par la Transaction, sesdits cheuaux ont esté estimez entre les Parties à plus qu'ils ne valoient, & compensez avec vne partie des fraiz deubs audit Sieur Abbé. Tellement que le bruit qu'en fait ledit Coüette, n'est que pur artifice. Il a eu tout l'auantage imaginable par ladite Transaction.

Ledit Coüette voyant que sa cause auoit vne tres-mauuaise face, a fait semblant pour tromper les Iuges, par vne Requête du 30. Ianuier 1659. de se departir du profit de l'Arrest d'absolution par luy surpris le 5. Septembre 1654. & de consentir que le Procez fust iugé tout de nouveau. Et ledit Sieur Abbé trouuoit si peu d'auantage en la Transaction dont il s'agit, qu'il l'auoit consenty par vne autre Requête du 3. Fevrier, pourueu que ledit Coüette se remist actuellement prisonnier en l'estat qu'il estoit lors de ladite Transaction, & qu'il payast les despens qu'il auoit causez par sa tricherie. Mais apres ladite Requête signifiée, ledit Coüette encores sommé de declarer son intention, & de se mettre actuellement en estat, a éludé, par vn silence affecté, qui témoignoit qu'il ne vouloit que Procez sans rien executer : Si bien que ledit Sieur Abbé voyant qu'on ne meditoit que de la ehicanne, a, en faueur du repos reuoqué, & persisté en ses defenses aux Lettres, par vne Requête du 15. du mesme mois. Et neantmoins, par Arrest contradictoire, malgré ledit Coüette, qui témoigna son crime par sa resistance, ledit Sieur Abbé a fait ioindre le Procez sur lequel est interuenue ladite Sentence du Mans, & ladite Transaction en consequence, pour justifier de plus en plus, & entant que besoin seroit, la temerité dudit Coüette, & qu'il ne sçait ce qu'il cherche, sinon qu'il se satisfait en plaidant & vomissant des injures contre ledit Sieur Abbé de Laubespain, lequel en aura, s'il plaist à la Cour, re-

paration, telle qu'elle est deuë à vn homme de sa condition, outrageusement offensé en son honneur, & de telle sorte, que la pudeur ne permet pas de transcrire icy la qualité des iniures & des calomnies contre luy esrites par ledit Coüette.

SECONDE INSTANCE.

PAR cette mesme Transaction du 30. May 1654. ledit Coüette est obligé de liberer ledit Sieur Abbé, & le mettre hors d'un cautionnement qu'il auoit fait pour luy, à raison du Bail judiciaire de sa Terre de la Roche de Vaast, qui est le sujet d'une Contresomation à luy faite par ledit Sieur Abbé, de la poursuite qu'il a faite & qu'il continuë contre Helie Desecots, lequel il a fait condamner en la Chambre des Vacations, mal à propos, & par vne procedure precipitée & non entendue. Desecots auoit pris cession dudit Bail judiciaire du nommé Euas, sous l'indemnité de la femme dudit Coüette & dudit Sieur Abbé de Laubespain, lequel s'y engagea pour faire plaisir audit Coüette, qui a jouy de sa Terre par ce moyen. C'est pourquoy s'il persecute ledit Desecots, ledit Sieur Abbé qui luy doit indemnité, retorque tout contre ledit Coüette, lequel par ladite Transaction, est obligé de l'en liberer & acquiter. Voicy la procedure qui a esté tenuë entr'eux.

La Terre de Coüette estant saisie reellement à la Requête de ses Creanciers, dès l'année 1651. Le Bail fut poursuiuy au Chasteauduloir, où vn nommé Euas, s'en rendit adjudicataire à deux cens dix liu. par chacun an. Coüette en cét estat, eut recours au Sieur Abbé de Laubespain son Bien-facteur, lequel interposa Desecots son Fermier, pour s'accommoder avec Euas, duquel il prit retrocession de ce Bail, moyennant cent liures par an de profit. Et le mesme iour, Desecots fit retrocession audit Coüette, sous le nom de sa femme, separée d'avec luy, & en prit son indemnité. Outre cela, ledit Sieur Abbé luy donna la sienne.

Cette femme mourut au mois d'Aoust de la mesme année 1651. & Coüette ne laissa pas de iouir de la Terre sans payer le prix du Bail iudiciaire. A quoy il est vray que ledit Sieur Abbé tenoit la main autant qu'il pouuoit, parce que ledit Coüette ne luy auoit pas encores fait l'outrage qu'il fit depuis, en la personne de Sœur Jacqueline de Laubespain.

Au mois de Mars 1653. Euas Fermier iudiciaire, fut arresté prisonnier, à la requête du Commissaire aux Saisies Reelles, qui le denonça à Desecots, & ledit Desecots audit Sieur Abbé, lequel eut encores la bonté d'interposer son credit pour faire surseoir, sur la parole dudit Coüette, qu'il satisferoit ou apporteroit main-leuée de ses Creanciers. Au lieu dequoy il commit le crime, surquoy est interuenue la Sentence & Transaction, qui est le sujet de la premiere Instance.

Desecots se voyant tous les jours menacé de la prison & de la saisie de ses biens pour le prix de ce Bail judiciaire, dont il auoit fait retrocession à Coüette sous le nom de sa femme qui estoit morte, nonobstant quoy il n'auoit pas laissé de iouir; & le voyant poursuiuy pour vn crime capital, à cause duquel il se dispoit à tout latiter, bailla sa Requête au Lieutenant General du Chasteauduloir, Iuge de toutes les Parties, & de la chose, duquel il obtint permission de saisir sur ledit Coüette à faute de payement du prix dudit Bail iudiciaire: En consequence de laquelle, il fit saisir 17. pipes de vin blanc, quatre chartées de foin, & quelques Bestiaux, le tout sur ladite Terre de la Roche de Vaast; c'estoient donc les fruits naturellement affectez au payement de ce dont il estoit question.

Coüette, sous le nom de sa fille, demanda la main-leuée pardeuant le Lieutenant General du Chasteauduloir; & elle luy fut accordée par Sentence, à la caution d'un nommé Bouuatier, lequel fit la sousmission; & neantmoins cét homme pretend aujourd'huy mal à propos, qu'il n'a esté Caution que des bestiaux, & qu'il a laissé le vin & le foin à l'abandon. C'est vne chicanne sans fondement, parce qu'il s'est rendu Caution des bestiaux & choses saisies, en general. Il n'y a point à gloser là dessus.

D'autre

D'autre part, ledit Couëtte interjeta Appel, tant comme de Juge incompetent, qu'autrement, de l'Ordonnance du Lieutenant General du Chasteauduloir, portant Permission de saisir. Et incontinent apres, le Procez Criminel renuoyé au Mans, ayant esté jugé par Sentence du 28. Mars 1654. la Transaction du 30. May se fit entre luy & ledit Sieur Abbé: Sur lequel deuoit tomber toute la poursuite d'Euas & de Desecots à raison du Bail judiciaire de la Roche, à cause de l'indemnité qu'il auoit baillée pour faire plaisir audit Couëtte; C'est pourquoy il y eut clause expresse par cette Transaction, que ledit Couëtte seroit tenu de le tirer & mettre hors de cette affaire; Au prejudice dequoy il a poursuiuy sur son Appel Desecots, qu'il sçauoit bien ne s'estre embarrassé en cette affaire, que sous l'indemnité dudit Sr de Laubespain. C'est donc contre & au prejudice de la Transaction; & mesmes auparauant que les Lettres afin de rescision, eussent esté signifiées, comme les dates en font la preuue. Et voicy vne estrange procedure faite par ledit Couëtte dans cét interstice.

Il est à obseruer, qu'au parant la Transaction du 30. May 1654. & que Bessin, Procureur de Desecots, en eust connoissance, il auoit fait deux Actes de Sommation au Procureur de Couëtte, de vider son appel par expedient, & hors jugement, suivant les Reglemens, voyant qu'il l'auoit qualifié *comme de Juge Incompetant*, croyant qu'il ne fust question, que de donner vn Juge, si le Lieutenant General de Chasteauduloir n'estoit pas competant, qui est vne pretention cerebrine, veu qu'il est Juge naturel de toutes les parties, & de la Terre; & duquel est emané le Bail judiciaire, dont il s'agit.

Mais le 2. Iuillet 1654. Couëtte, qui vouloit détruire la Transaction susdite, & au prejudice d'icelle, sous pretexte des Lettres afin de rescision, du 20. Iuin, gardées jusqu'au 29. Nouembre ensuiuant, bailla vne Requête à la Cour, par laquelle il changea toute la face de l'affaire, d'autant qu'il interjeta Appel pur & simple des saisies, pour faire juger le fonds en la Cour; & à cette fin, demanda que son appel fust conuertý en opposition; & y faisant droit, que la restitution des choses saisies luy fust faite, avec condamnation de despens, dommages, & interets; Il demanda encores d'estre crû de plusieurs choses, qu'il supposoit à son ordinaire, luy auoir esté spoliées, & non comprises dans la saisie. Apres laquelle Requête, il est certain que la Cause n'estoit plus de l'Expedient; C'estoit vne Cause à mettre au Roolle pour plaider, ou appointer, & instruire en la maniere accoustumée.

Neantmoins Couëtte, pour precipiter l'affaire, & empescher qu'elle ne fust éclaircie, ny instruite, par les Sommations & Contresommations qui sont aujourd'huy à juger, prit au mois d'Aoust mil six cens cinquante-quatre, (luy qui depuis la Transaction a son domicile à Paris, comme il est iustificié) vn Executoire de sejour contre le Procureur, à faute de vider incessamment cette Cause par Expedient; & hors Jugement: En vertu duquel, il luy fit vn vacarme espouventable, ayant fait, non seulement saisir & executer ses meubles: mais aussi les loyers qui luy estoient deubs. Ce qui obligea le Procureur de s'opposer durant les Vacations, par Requête, sur laquelle ayant fait mettre vn *soit monsté*, ledit Couëtte ne voulut comparoir au Parquet, & luy tint, comme l'on dit, le pied sur la gorge, pour auoir sa main-leuée. De sorte qu'il fut contraint par cette vexation, d'aller à l'Audience de ladite Chambre des Vacations, sans Requête, ny à venir quelconque; & là, on pretend que fut rendu vn Arrest le 14. Octobre 1654. tant sur les appellations & demande de Couëtte, que sur la main-leuée requise par le Procureur, par lequel, *le tout fut renuoyé à l'Expedient*; & que le 20. Octobre ensuiuant, fut passé vn Arrest à ladite Chambre des Vacations, par l'aduis (dit'on) de Maistres Claude Gaultier, & Jacques Lambin Aduocats, tous deux pris pour Tiers, qui est vne precaution impertinente & insolite: Par lequel, la main-leuée fut faite au Procureur de ses meubles & loyers saisis: Mais à l'esgard dudit Desecots, Couëtte escriuit luy-mesme son Arrest, & fit prononcer, mal, nullement & incompetemment par le Lieutenant General du Chasteauduloir; l'Appel de la saisie conuertý en opposition; & y fai-

sant droit, main-levée, restitution, despens, dommages & interêts adjugez audit Couëtte, sans liquidation, ny moderation. Jamais il ne se vit vn pareil Arrest d'Expedient. Mais le mal est prouenu de ce que le Procureur, qui n'auoit point d'instruction, auoit besoin de la main-levée de ses meubles & loyers saisis, en vertu de l'Executoire de sejour, qui estoit vne pure violence dudit Couëtte. Et tout cela fut fait à l'insceu, tant dudit Desecots, que dudit Sieur Abbé de Laubespain, qui dormoit en repos sur la Transaction du 30. May precedent.

Au mois de Novembre audit an 1654. Couëtte vint faire signifier ses Lettres de rescision audit Sieur Abbé, & exercer ses violences contre Desecots, en vertu de cet Arrest de la Chambre des Vacations. Il fit faire vne estimation phantastique pardeuant vn Notaire qu'il choisit, du foin & du vin que Bouuatier Caution, pretend auoir laissé à l'abandon; & sans autre forme, fit enleuer les bestiaux de Desecots plusieurs fois pour auoir de l'argent, qui fut baillé par ledit Desecots pour se redimer de la violence, & sous ses protestations de repeter & recourir, contre tous qu'il appartiendroit. Et apres auoir pris conseil de ce qu'il auoit à faire, il a obtenu Lettres en forme de Requête Ciuile, tant contre l'Executoire de sejour, obtenu par Couëtte, à faute de viuer incessamment la Cause par Expedient, que contre les Arrests de la Chambre des Vacations, des 14. & 20. Octobre 1654. & interjetté appel des Saisies & Executions faites en consequence. Il a intenté ses Sommations contre Bouuatier, Caution; & contre ledit sieur Abbé, lequel a intenté sa Contresommation contre ledit Couëtte: En laquelle il n'estime pas qu'il y ait difficulté, puisque ledit Couëtte a profité des fruits dont est question, & est obligé de l'indemniser.

Ledit Sieur Abbé demeure d'accord, qu'il est garent, & doit indemniser Desecots; & pour cela il auoit estimé qu'il estoit bon qu'il s'opposast à l'execution de l'Arrest de la Chambre des Vacations du 20. Octobre 1654. Mais n'y estant dénommée ny compris, le Reglement qu'il offroit sur la Requête afin d'opposition, fut rejeté par Arrest. Tellement que la Cour a laissé la discussion de la matiere audit Desecots, seule partie dénommée en cet Arrest, & autres precedens. Mais ledit Sieur Abbé se trouue tousiours obligé d'en obseruer la qualité, à cause des Sommations & Contresommations, se trouuant, comme il est, garent formel dudit Desecots, lequel ayant obtenu Lettres en forme de Requête Ciuile, tant contre l'Executoire de sejour, qu'Arrests des 14. & 20. Octobre 1654. elles ont esté appointées au Conseil, & joint; & Couëtte debouté en connoissance de Cause par Arrest contradictoire, de l'opposition qu'il auoit formée à l'execution de cet Appointement au Conseil. Lors duquel Arrest, la Cour reconnut bien la violence & la nullité de la procedure dudit Couëtte, aussi bien que l'incompetence de la Chambre des Vacations pour rendre lesd. Arrests.

Et en effet, la procedure est insoustenable: Car depuis la Requête du 2. Iuillet 1654. qui changeoit absolument la face de l'affaire, la Cause n'estoit plus de l'Expedient; Il ne s'agissoit plus de donner vn Iuge: Mais de iuger la Cause au fonds, & pour cela il falloit instruire. Desecots auoit ses Sommations à intenter contre Bouuatier, & ledit Sieur Abbé. Et ledit Sieur Abbé sa Contresommation contre ledit Couëtte. Il falloit mettre la Cause au Rolle, & la plaider ou appointer en la maniere accoustumée. Donc, l'ordonnance & Executoire de sejour pris par Couëtte au mois d'Aoust 1654. contre Bessin Procureur dudit Desecots; & ce qu'il a fait contre luy, pour luy faire porter à l'Expedient vne Cause qu'il n'en estoit pas, est vne violence intolérable en iustice. Et l'Arrest rendu sur les Appellations, & autres incidens, à la Chambre des Vacations, le 14. Octobre ensuiuant, portant renuoy du tout, à l'Expedient, aussi bien que celui qui s'en est ensuiuy le 20. Octobre, n'ont point de force, parce qu'il n'estoit pas au pouuoir des Procureurs, de faire cette mauuaise procedure au prejudice de leurs Parties, ny pareillement au pouuoir de la Chambre des Vacations de rendre lesdits Arrests. C'est vne Maxime indubitable, que de tous les défauts, il n'y en a point de plus grand que celui de la Puissance: *Omnium defectuum, nullus maior, quam Potestatis.*

Ouy, mais (dit-on) Bessin Procureur, auoit luy-mesme poursuiuy à l'Expedient. La Response est, que cela estoit auparauint la Requête du 2. Iuillet, & lors qu'il ne voyoit qu'un appel d'incompetence, qui est de l'Expedient. On dit aussi que depuis l'Executoire de sejour, & Saisies sur luy faites, il a executé l'Arrest du 14. Oct. portant renuoy à l'Expedient; qu'il a signé, en consequence, l'Arrest diffinitif du 20. Octobre, où il a esté pris plus de precaution, qu'à l'ordinaire, parce qu'il y a eu deux Tiers au lieu d'un; & qu'il a mauuaise grace de signer luy-mesme aujourd'huy son defaueu, & reconnoistre qu'il n'auoit point de charge de sa partie, de faire cette procedure. A cela, la Response est, que le defaueu en est meilleur, & la verité d'autant plus constante, puisque le Procureur auoué luy-mesme qu'il n'auoit point de pouuoir: Nonobstant quoy, ledit Couëtte n'a pas esté assez hardy, pour intenter vne Sommation encontre dudit Bessin, qui s'en seroit defendu sur la violence contre luy exercée par les Saisies de ses meubles & loyers, en vertu de l'Executoire de sejour, & par l'Arrest rendu ensuite par la Chambre des Vacations, le 14. Octobre 1654. portant renuoy du tout à l'Expedient. Lesdits Executoire & Arrest ne pouuans subsister, celui du 20. Octobre, n'a point de fondement.

Et au reste, c'est vne prodigieuse erreur, de dire, que la Chambre des Vacations eust le pouuoir de rendre lesdits Arrests; parce que (dit-on) il ne s'agissoit pas de 1200. liures, dont elle peut connoistre, les despens, dommages, & interets, n'estans pas à considerer en ce rencontre. C'est vouloir donner le change, que de parler ainsi.

Premierement, parce qu'il ne faut pas regarder l'euement pour reconnoistre s'il ne s'agissoit que de 1200. mais les demandes & contestations. Or si l'on examine la Requête présentée par ledit Couëtte, le 2. Iuillet 1654. l'on trouuera qu'il pretendoit restitution de plus de deux ou trois mil liures de meubles, & ne s'est jamais restreint à 1200. liures.

Secondement, quand il y auroit eu moins de 1200. liures au principal, on sçait pourquoy la Chambre des Vacations est establee, & de quoy elle doit connoistre. Il n'y a point de Rose en ladite Chambre, parce qu'on n'y plaide aucunes Appellations, & n'est pas establee pour cela.

Bien est vray que ceux de Messieurs les Conseillers de la Grand' Chambre seruaient en ladite Chambre des Vacations, qui se trouuent Rapporteurs d'Instances reglées & en estat, dont la contestation n'excede pas douze cens liures peuvent les iuger en ladite Chambre. Mais c'est un pouuoir limité aux Instances, dont lesdits Sieurs Conseillers de la Grand' Chambre se trouuent Rapporteurs, & qui ne passe pas mesmes iusques à Messieurs des Enquestes, qui vont par ordre du Tableau, seruir en ladite Chambre des Vacations. Et à l'égard des Appellations verbales, non reglées, de quelque qualité qu'elles soient, il ne s'y en plaide point; Il n'y a point de Roole en ladite Chambre. Tellement que l'Arrest du 14. Octobre 1654. portant renuoy à l'Expedient des Appellations dudit Couëtte, & de toute la matiere dont estoit question, & celui du 20. Octobre en consequence, ne sont pas des Arrests qui ayent forcé ny autorité, non plus, que si par erreur, les Procureurs auoient procedé, & fait rendre des Arrests sur la matiere, en la Cour des Aydes, qui n'auroit pas le pouuoir d'y prononcer, non plus qu'eux de luy en attribuer la connoissance au prejudice de leurs Parties.

Et au fonds, il n'y eut iamais rien de si cruel & moins supportable, que la condamnation portée par ledit Arrest du 20. Octobre. Il prononce mal, nullement & incompetamment sur l'Appel de l'Ordonnance du Lieutenant General du Chasteauduloir. Et où pris cette incompetence? N'est-il pas le Iuge de toutes les Parties, & de la chose, & celui deuant lequel le Bail judiciaire a esté fait? Il ne faut point confondre le Lieutenant General, avec le Lieutenant Criminel, temerairement pris à partie par ledit Couëtte, sur le Procez criminel iugé par contumace, & depuis renuoyé au Mans; Ce sont deux differens Iuges. Au surplus, ledit Arrest declare les saisies faites sur le-

dit Coüette iniurieuses, & luy adjuge la restitution de ce que luy-mesme auoit repris sous la caution de Bouuatier; & outre cela, il porte au profit dudit Couëtte, condamnation indefinie de despens, dommages, & interests, qu'il pretend porter à des sommes immenses: En quoy double méprise.

La premiere, en ce qu'on ne peut pas restituer audit Couette, ce qu'il a repris luy-mesme à la Caution dudit Bouuatier, qui s'est soumis Caution pour tout ce qui estoit faisi sur luy, & qui a en consequence de ce, disposé de tout comme bon luy a semblé.

La seconde, que l'on ne pouuoit pas declarer lesdites Saisies iniurieuses, puisque constamment Coüette est Debituer, & n'a fourny Quitances du prix du Bail, Descharge ny Main-leuée de ses Creanciers; que ledit Desecots, & ledit sieur Abbé de Laubepin, se sont embarassez pour luy, qui a pris retrocession du Bail sous le nom de sa femme, laquelle estant decedée dès le mois d'Aoust de la mesme année 1651. ledit Coüette n'a pas laissé de jouir de ladite retrocession de Bail; & enfin par la Transaction du 30. May 1654. posterieurement ausdites Saisies, il s'est obligé d'en liberer & acquiter ledit Sieur Abbé de Laubepin, qu'il scauoit auoir baillé son indemnité à Desecots, pour prendre cession d'Euas, Fermier judiciaire, à sa priere & requeste, & pour luy faire plaisir seulement. Et ainsi, il faut bien par necessité que ledit Couëtte apporte vne Quitance du prix dudit Bail, ou vne Descharge & Main-leuée, bonne & valable, de ses Creanciers.

Et ne sert de dire, que ledit Coüette, apres le decez de sa femme, obtint vn Arrest sur Requeste le dernier jour des Vacations 27. Octobre 1651. par lequel il fut receu Appellant de la Saisie Reelle, & ce qui s'en est ensuiuy: & que les Creanciers apporteroient leurs Tiltres dans vn mois, pour contester pardeuant le Rapporteur de ladite Requeste, & cependant defenses. Premièrement, parce que ledit Arrest, qui est vne surprise du temps, ne paroist pas auoir jamais esté signifié ny executé, par la contestation ordonnée par iceluy avec lesdits Creanciers, ny autrement, en quelque façon que ce soit. Secondement, cet Arrest ne regarde point du tout les Conventions particulieres de ceux qui se sont obligez pour luy, & ausquels il faut vne bonne & valable Descharge. Et de fait, ledit Coüette s'est encores obligé posterieurement audit Arrest, par la Transaction du 30. May 1654. Conséquemment, bien loin de meriter des dommages & interests, la Cour jugera, que c'est luy qui les doit; que le Lieutenant General du Chasteauduloir estoit competant de la matiere; que les saisies sur luy faites à la Requeste de Desecots, à faute de Quitance, ou Descharge valable du prix du Bail judiciaire sur luy fait, sont bonnes & valables; que Bouuatier, Caution, doit représenter toutes les choses saisies; & ledit Coüette condamné de garantir, liberer & indemniser ledit Sieur de Laubepin, de tout l'euenement, tant en demandant & defendant, que des Sommations & Contresommations.

Monsieur LE BOVLTS, Rapporteur.

